

合肥縣志卷第二十二

賜進士出身廬州府合肥縣知縣左輔纂修

人物傳第二

宋

馬亮字叔明廬州合肥人舉進士爲大理評事知蕪湖縣再遷殿中丞通判常州吏民有因緣亡失官錢籍其貲猶不足以償妻子連逮者至數百人亮縱去緩與之期不踰月盡輸所負羅處約使江東以亮治行聞擢知濮州會諸路轉運司置糾察刑獄官以福建路命亮覆訊冤獄全活者數十人遷太常博士知

合肥縣志卷二十一

傳

一

福州蘇易簡薦亮才任繁劇召還同提點三司都勾院磨勘憑由司久之出知饒州州豪白氏多執吏短長嘗殺人以赦免愈驚橫爲閭里患亮發其奸誅之部中畏懼州有鑄錢監匠多而銅錫不給亮請分其工之半別置監於池州歲增鑄緡錢十萬遷殿中侍御史眞宗卽位上書言陛下初政軍賞宜速而所在不時給請遣使分督之又赦書蠲除州縣逋負而有司趣責愈急宜如赦推恩以寬民故事以親王尹開封地尊勢重嫌隙易生願鑒其繇以示保全親愛之道契丹仍歲南侵河朔蕭然請修好以息邊民帝善

其言以亮爲可用王均反以爲西川轉運副使賊平王將邀功誅殺不已亮全活千餘人城中米斗千錢亮出廩米裁其價人賴以濟召問蜀事會械送賊註誤者八十九人至闕下執政欲盡誅之亮曰愚民脅從此特百之一二餘竄伏山林者眾今不貸之反側之人聞風疑懼一唱再起是滅一均生一均也帝悟悉宥之加直史館復遣還部時諸州鹽井歲久泉涸而官督所負課繫捕者州數百人亮盡釋繫者而奏廢其井又除屬部舊逋官物二百餘萬還知潭州屬縣有亡命卒剽攻爲鄉閭患人共謀殺之事覺法當

死者四人亮咸貸之日爲民去害而反坐以死罪非法意也徙昇州行次江州屬歲旱民饑湖湘漕米數十舟適至亮移文守將發以賑貧民因奏瀕江諸郡皆大歉而吏不之救願罷官糴令民轉粟以相賙以右諫議大夫知廣州時宜州陳進初平而澄海兵從進反者家屬二百餘人法當配隸亮悉置不問鹽戶逋課質其妻子於富室悉取以還其家海舶久不至使招來之明年至者倍其初珍貨大集朝廷遣中使賜宴以勞之是歲東封亮敦諭大食陀婆離蒲含沙貢方物泰山下厯知虔洪二州江陵府再遷尚書工

部侍郎復知昇州徙杭州加集賢院學士先是江濤大溢調兵築堤而工未就詔問所以捍江之策亮褒詔禱伍員祠下明日潮爲之卻出橫沙數里堤遂成入爲御史中丞建言士民父祖未葬而析居請自今未葬者毋得輒析明年改兵部侍郎知廬州徙江陵又徙江寧府仁宗初拜尚書右丞復知廬州召判尚書都省兼知審刑院遷工部尚書知亳州又遷江寧府以太子少保致仕卒贈尚書右僕射亮有智畧敏於政事然其所至無廉稱呂夷簡少時從其父蒙亨爲縣福州亮見而奇之妻以女妻劉恚曰嫁女當與

縣令兒邪亮曰非爾所知也陳執中梁適爲京官田況宋庠及其弟祁爲童子時亮皆厚遇之曰是後必大顯世以亮爲知人亮卒時夷簡在相位有司諡曰忠肅人不以爲是也子仲甫爲天章閣待制

宋史

馬仲甫字子山太子少保亮子也舉進士知登封縣轅轅道險屢遂傭民鑿平爲坦塗人便其行爲刻石頌美通判趙州知台州爲度支判官內侍楊永德言漕舟淮汴間惟水遞鋪爲便詔仲甫偕往訂可否還言其害十餘條議遂格出爲夔路轉運使歲饑盜粟者當論死仲甫請罪減一等詔須奏裁復言饑羸拘

囚比得報死矣請決而後奏彼使淮南真揚諸州地狹出米少官糴之多價常踊登濱江米狼戾而農無所售仲甫請移糴以舒其患兩益於民從之遂繇戶部判官爲發運使自淮陰涇泗上浮長淮風波覆舟歲罹其患仲甫建議鑿洪澤渠六十里漕者便之拜天章閣待制知瀛州秦州古渭介有唐之南夏人在其北中通一徑小警則路絕仲甫得筆粟城故址自雞川砦築堡北抵南谷環數百里爲內地詔賜名甘谷堡故時羌人入城貿易皆僦邸仲甫設館處之陽示禮厚實閑之也熙寧初守亳許揚三州糾察在京

合肥縣志卷二十一 傳 四

刑獄知通進銀臺司復爲揚州提舉崇禧觀卒

宋史

姚鉉字寶之廬州合肥人太平興國八年進士甲科解褐大理評事知潭州湘鄉縣三遷殿中丞通判簡宣昇三州淳化五年直史館侍宴內苑應制賦賞花釣魚詩特被嘉賞翌日命中使就第賜白金以獎之至道初遷太常丞充京西轉運使歷右正言右司諫河東轉運使俄上言曰伏見諸路官吏或彊明莅事惠愛及民者則必立條教除其煩擾然狡胥之輩非其所便候其罷官悉藏記籍害公蠹政莫甚於此禮云其人存則其政舉其人亡則其政息又語曰舊令

尹之政必告新令尹斯實聖人之格言國家之急務也欲望所在官吏有經畫利濟事可常久者歲終書厯受代日錄付新官俾之遵守若事有灼然匪便聽上聞俟報改正詔從之咸平二年河決鄆州王陵埽東南注鉅野又淮西城中積水壞廬舍以鉉知州事徙州於汶陽鄉之高原委以營度許便宜從事工畢加起居舍人京東轉運使徙兩浙路鉉雋爽頗尙氣薛映知杭州與之不協事多矛盾映摭鉉罪狀數條密以聞詔使劾之當奪一官特除名貶連州文學吉州之萬安抵虔江有贛石舟行其中湍險萬狀鉉過

合肥縣志卷二十一 傳 五

感而賦之以自況大中祥符五年會赦移岳州又移舒州俄授本州團練副使天禧四年卒年五十三鉉文詞敏麗善筆札藏書至多頗有異本兩浙課吏寫書亦薛映所掎之一事雖被竄斥猶傭夫荷擔以自隨有集二十卷又采唐人文章纂爲百卷目曰文粹卒後子嗣復以其書上獻詔藏內府授嗣復永城主簿幼子稱俊穎美秀頗善屬辭裁十歲卒鉉紀其事爲聽悟錄人多傳之

宋史

包令儀字肅之進士及第授朝散大夫行尙書虞部

員外郎分帥南京上護軍子拯貴贈刑部侍郎

府志

包拯字希仁廬州合肥人也始舉進士除大理評事
出知建昌縣以父母皆老辭不就得監和州稅父母
又不欲行拯卽解官歸養後數年親繼亡拯廬墓終
喪猶徘徊不忍去里中父老數來勸勉久之赴調知
天長縣有盜割人牛舌者主來訴拯曰第歸殺而鬻
之尋復有來告私殺牛者拯曰何爲割牛舌而又告
之盜驚服徙知端州遷殿中丞端土產硯前守緣貢
率取數十倍以遺權貴拯命製者才足貢數歲滿不
持一硯歸尋拜監察御史裏行改監察御史時張堯
佐除節度宣撫兩使右司諫張擇行唐介與拯共論

之語甚切又嘗建言曰國家歲賂契丹非禦戎之策
宜練兵選將務實邊備又請重門下封駁之制及廢
錮臧吏選守宰行考試補蔭弟子之法當時諸道轉
運加按察使其奏劾官吏多摭細故務苛察相高尙
吏不自安拯於是請罷按察使去使契丹契丹令典
客謂拯曰雄州新開便門乃欲誘我叛人以刺疆事
耶拯曰涿州亦嘗開門矣刺疆事何必開便門哉其
人遂無以對歷三司戶部判官出爲京東轉運使改
尙書工部員外郎直集賢院徙陝西又徙河北入爲
三司戶部副使秦隴斜谷務造船材木率課取於民

又七州出賦河橋竹索恆數十萬拯皆奏罷之契丹聚兵近塞邊郡稍警命拯往河北調發軍食拯曰漳河沃壤人不得耕邢洛趙三州民田萬五千頃率用牧馬請悉以賦民從之解州鹽法率病民拯往經度之請一切通商販除天章閣待制知諫院數論斥權倖大臣請罷一切內除曲恩又列上唐魏鄭公三疏願置之坐右以爲龜鑒又上言天子當明聽納辨朋黨惜人才不主先入之說凡七事請去刻薄抑僥倖正刑明禁戒興作禁妖妄朝廷多施行之除龍圖閣直學士河北都轉運使嘗建議無事時徙兵內地不

報至是請罷河北屯兵分之河南兗鄆齊濮曹濟諸郡設有警無後期之憂借曰戍兵不可遽減請訓練義勇少給餼糧每歲之費不當屯兵一月之用一州之賦則所給者多矣不報徙知瀛州諸州以公錢貿易積歲所負十餘萬悉奏除之以喪子乞便郡之揚州徙廬州遷刑部郎中坐失保任左授兵部員外郎知池州復官徙江寧府召權知開封府遷右司郎中拯立朝剛毅貴戚宦官爲之斂手聞者皆憚之人以包拯笑比黃河清童稚婦女亦知其名呼曰包待制京師爲之語曰關節不到有閻羅包老舊制凡訟訴

不得徑造庭下拯開正門使得至前陳曲直吏不敢欺中官勢族築園榭侵惠民河以故河塞不通適京師大水拯乃悉毀去或持地券自言有僞增步數者皆審驗劾奏之遷諫議大夫權御史中丞奏曰東宮虛位日久天下以爲憂陛下持久不決何也仁宗曰卿欲誰立拯曰臣不才備位乞豫建太子者爲宗廟萬世計也陛下問臣欲誰立是疑臣也臣年七十且無子非邀後福者帝喜曰徐當議之請裁抑內侍減節冗費條責諸路監司御史府得自舉屬官減一歲休暇日事皆施行張方平爲三司使坐買豪民產拯

合肥縣志卷二十一 傳 八

劾奏罷之而宋祁代方平拯又論之祁罷而拯以樞密直學士權三司使歐陽修言拯所謂牽牛蹊田而奪之牛罰已重矣又貪其富不亦甚乎拯因家居避命久之乃出其在三司凡諸筦庫供上物舊皆科率外郡積以困民拯特爲置場和市民得無擾吏負錢帛多縲繫間輒逃去并械其妻子者類皆釋之遷給事中爲三司使數日拜樞密副使頃之遷禮部侍郎辭不受尋以疾卒年六十四贈禮部尚書諡孝肅拯性峭直惡吏苛刻務敦厚雖甚嫉惡而未嘗不推以忠恕也與人不苟合不僞辭色悅人平居無私書故

人親黨皆絕之雖貴衣服器用飲食加布衣時嘗曰後世子孫仕宦有犯贓者不得放歸本家死不得葬大塋中不從吾志非吾子若孫也初有子名縉娶崔氏通判潭州卒崔守死不更嫁拯嘗出其媵在父母家生子崔密撫其母使謹視之縉死後取媵子歸名曰縉有奏議十五卷縉奉議郎潭州通判贈太常太

祝

宋史

楊察字隱甫其先晉人從唐僖宗入蜀家於成都至其祖鈞始從孟昶歸朝鈞生居簡仕真宗時至尙書都官員外郎嘗官廬州遂爲合肥人居簡生察景祐

元年舉進士甲科除將作監丞通判宿州遷祕書省著作郎直集賢院出知潁壽二州入爲開封府推官判三司鹽鐵度支勾院修起居注歷江南東路轉運使屬吏以察年少易之及行部數撻奸隱衆始畏服察在部專以舉官爲急務人或議之察曰此按察職也苟倚拾羨餘則俗吏之能何必我哉召爲右正言知制誥權判禮部貢院時上封者請罷有司糊名考士及變文格使爲放軼以襲唐體察以謂防禁一瀆則奔競復起且文無今昔惟以體要爲宗若肆其瀆漫亦非唐氏科選之法前議遂寢晏殊執政以妻父

嫌換龍圖閣待制母憂去職服除復爲知制誥拜翰林學士權知開封府擢右諫議大夫權御史中丞論事無所避會詔舉御史建言臺屬供奉殿中巡糾不法必得通古今治亂良直之臣今舉格太密坐細故皆置不取恐英偉之士或有所遺御史何剡以論事不得實中書問狀察又言御史故事許風聞縱所言不當自繫朝廷采擇今以疑似之間遽被詰問臣恐臺諫官畏罪緘默非所以廣言路也又數以言事忤宰相陳執中未幾三司戶部判官楊儀以請求貶官察坐前在府失出笞罪雖去官猶罷知信州徙揚州

復爲翰林侍讀學士又兼龍圖閣學士知永興軍加端明殿學士知益州再遷禮部侍郎復權知開封府復兼翰林學士權三司使內侍楊永德毀察於帝三司有獄辭連衛士皇城司不卽遣而有詔移開封府鞫之察由是乞罷三司乃遷戶部侍郎兼三學士提舉集禧觀進承旨論年復以本官充三司使餌鍾乳過劑病癱卒贈禮部尚書諡宣懿察美風儀幼孤七歲始能言母頗知書嘗自教之敏於屬文其爲制誥初若不用意及藁成皆雅緻有體當世稱之遇事明決敏於吏職雖多益喜不厭癱方作猶入對商畫財

利歸而大頓人以爲用神太竭云有文集二十卷無子以兄子庶爲嗣弟寘舉進士第一通判潤州以母憂不赴毀瘠而卒時人傷之

宋史

鍾離瑾字公瑜廬州合肥人舉進士爲簡州推官以殿中丞通判益州建言州郡旣上雨後雖凶旱多隱之以成前奏請令監司劾其不實者擢開封府推官出提點兩浙刑獄衢潤州饑聚餓者食之頗廢農作請發米二萬斛賑給家毋過一斛後徙淮南轉運副使歷京西河東河北轉運使改江淮制置發運使殿直王乙者請自揚州召伯埭東至瓜州濬河百二十

合肥縣志卷二十一

傳 十一

里以廢二埭詔瑾規度以工大不可就止置插召伯埭蜀人以爲利屢遷尚書刑部郎中爲三司戶部副使除龍圖閣待制權知開封府未踰月得疾仁宗封藥賜之使未及門而卒

宋史

趙廣淳化中八世同居

江南通志

王光濟廬州人喪母因刻像日夕奉事如平生孝道純篤咸平二年本州以孝聞有詔旌之

宋史

胥致堯少力學爲文辭官至左班殿直歐陽修志其墓子流以才能稱

江南通志

李臺卿字明仲廬州人性介特博學彊記有史學考

正同異多所發明知天文律歷千歲之日可坐數也
蘇軾謫居黃州臺卿爲麻城主簿因識之罷歸卒軾
有詩弔之

江南通志

陳相紹興末爲吏部侍郎有賢能聲

府志

何宗壽梁縣人淳熙十二年母沈氏病宗壽刲左股
煑粥以進母遂愈

江南通志

李吳貞年九歲母孫氏病吳貞刲左股煑粥母食之
稍愈兄曾貞復刲右股進母遂全愈

江南通志

束元嘉任通城簿毀淫祠正風俗嘗攝縣令以政最
聞後知秦州賑饑有法全活甚眾累官樞密都承旨

合肥縣志卷二十一

傳 十一

引老歸年九十九

江南通志

劉虎廬州梁縣人起農家隸軍籍力戰累功擢副都
統總轄淮陰水陸軍馬拒元師於五河率勇士乘風
縱火中流矢洞腹達背悶絕復甦揮兵更戰意氣彌
厲援壽春自三月至五月戰百餘卒解其圍奏凱
進利州觀察使拜合肥侯寶祐元年知泰州繕城浚
隍恆若敵至會箭毒發歸卒年五十有三兄海從弟
師勇師雄師賢皆爲一時名將

江南通志

密佑其先密州人後渡淮居廬州佑爲人剛毅質直
累官至廬州駐劄御前遊擊中軍統領改權江西路

副總管咸淳十年以閣門宣贊舍人爲江西都統是冬太元丞相伯顏下鄂州畱右丞阿里海牙守之而將大兵東下明年二月朱禩孫遣高世傑取鄂阿里海牙以兵逆擊執世傑荆江口兵盡潰半入江西江西制置黃萬石招集之且募寧都廣昌南劔義兵千餘人盡以屬佑十一月大兵至隆興劉槃兵敗乃嬰城自守萬石時移治撫州將遁懼佑不從乃調佑兵援槃且戒以勿戰未至隆興槃已降都統夏驥率所部兵潰圍出已而元帥張榮實呂師夔提兵逼撫州佑率眾逆之進賢坪兵來呼曰降者乎鬪者乎佑曰

鬪者也麾其兵突戰進至龍馬坪大兵圍之數重矢下如雨佑告其部曰今日死日也若力戰或有生理眾咸憤厲自辰戰至日昃佑面中矢拔之復戰又身被四矢三槍眾皆死僅餘數十人佑乃揮雙刀斫圍南走前渡橋馬踏板斷遂被執眾見其勇戒勿殺輿歸隆興元帥宋都爵曰壯士也欲降之繫之月餘終不屈嘗罵萬石爲賣國小人使我志不得伸宋都解命劉槃呂師夔坐城樓引佑樓下以金符遺之許以官佑不受語侵槃師夔益不遜又令佑子說之曰父死子安之佑斥曰汝行乞於市第云密都統子誰不

憐汝也怡然自解其衣請刑遂死觀者皆泣下

宋史

劉師勇者廬州人以戰功歷環衛官魯港師潰賈似道欲東入海師勇贊之入揚州圖再舉似道然之時姚訾復常州似道命師勇以淮兵取呂城朝廷加師勇和州防禦使助訾守常州而以張彥守呂城合兵拒大軍戰失利彥馬弱陷淖中見執呂城失守常州勢益孤大軍寘彥城下招降師勇以大義斥彥彥慚而退又遣范文虎來諭伏弩射走之常受圍數月援兵絕有羣鴟飛鳴繞城眾惡爲不祥俄而城陷師勇拔柵戰且行其弟馬墮塹躍不能出師勇舉手與訣

合肥縣志卷二十一 傳 十四

而去淮軍數千人皆鬪死有婦人伏積屍下闕淮兵六人反背相拄殺敵十百人乃殪師勇從二王至海上見時事不可爲憂憤縱酒卒葬于鼓山

宋史張世

傑傳

褚一正字粹翁廬州人武舉進士督戰高沙被創竟

没于水

宋史宋應龍傳

葛化龍字雲升自號竹溪祖權父汝明在宋皆明經化龍生值宋亡遂絕意仕進隱居湖干寄跡漁樵年

七十九卒

府志

余闕字廷心一字天心唐古氏世家河西武威父實喇卜藏布官廬州遂爲廬州人少喪父授徒養母與吳澄弟子張恆游文學日進元統元年賜進士及第授同知泗州事爲政嚴明宿吏皆憚之俄召入應奉翰林文學轉中書刑部主事以不阿權貴棄官歸尋以修遼金宋三史召復入翰林爲修撰拜監察御史改中書禮部員外郎出爲湖廣行省左右司郎中會莫瑤蠻反右丞實保當帥師堅不往無敢讓之闕曰右丞當往受天子命爲方嶽重臣不思執弓矢討賊乃欲自逸邪右丞當往實保曰郎中語固是如芻餉

不足何闕曰右丞第往此不難致也闕下令趨之三日皆集實保行復以集賢經歷召入遷翰林待制出僉浙東道廉訪司事丁母憂歸廬州盜起河南陷郡縣至正十三年行中書於淮東改宣慰司爲都元帥府治淮西起闕副僉都元帥府事分兵守安慶於時南北音問隔絕兵食俱乏抵官十日而寇至拒却之乃集有司與諸將議屯田戰守計環境築堡砦選精甲外扞而耕稼於中屬縣灑山八社土壤沃饒悉以爲屯明年春夏大饑人相食乃捐俸爲粥以食之得活者甚眾民失業者數萬咸安集之請於中書得鈔

三萬錠以賑民陞同知副元帥又明年秋大旱爲文祈灑山神三日雨歲以不饑盜方據石蕩湖出兵平之令民取湖魚而輸魚租十五年夏大雨江漲屯田禾半沒城下水湧有物吼聲如雷闕祠以少牢水輒縮秋稼登得糧三萬斛闕度軍有餘力乃浚隍增障隍外環以大防深塹三重南引江水注之環植木爲柵城上四面起飛樓表裏完固俄陞都元帥廣西苗軍五萬從元帥阿爾斯蘭沿江下抵廬州闕移文謂苗蠻不當使之窺中國詔阿爾斯蘭還軍苗軍有暴於境者卽收殺之莫敢犯時羣盜環布四外闕居其

中左提右挈屹爲江淮一保障論功拜江淮行省參知政事仍守安慶通道于江右商旅四集池州趙普勝帥眾攻城連戰三日敗去未幾又至相拒二旬始退懷寧縣達嚕噶齊伯嘉努戰死十七年趙普勝同青軍兩道攻我拒戰一月餘竟敗而走秋拜淮南行省右丞安慶倚小孤山爲藩蔽命義兵元帥胡巴延統水軍戍焉十月沔陽陳友諒自上游直擣小孤山巴延與戰四日夜不勝急趣安慶賊追至山口鎮明日癸亥遂薄城下闕遣兵扼於觀音橋俄饒州祝寇攻西門闕斬却之乙巳賊乘東門紅旗登城闕簡死

士力擊賊復敗去戊申賊并軍攻東西二門又却之賊恚甚乃樹柵起飛樓庚戌復來攻我金鼓聲震地闕分諸將各以扞賊晝夜不得息癸卯賊益生兵攻東門丙午普勝軍東門友諒軍西門祝寇軍南門羣盜四面蟻集外無一甲之援西門勢尤急闕身當之徒步提戈爲士卒先士卒號哭止之揮戈愈力仍令麾下將督三門之兵自以孤軍血戰斬首無算而闕亦被十餘創日中城陷城中火起闕知不可爲引刀自剄墮清水塘中妻伊伯氏及子德生女福童皆赴井死同時死者守臣韓建一家被害建方臥疾罵賊

不屈賊執之以去不知所終城中民相率登城樓自捐其梯曰寧俱死此誓不從賊焚死者以千計其知名者萬戶李宗可紀守仁陳彬金承宗元帥府都事特穆爾布哈萬戶府經歷段桂芳千戶和斯布哈錫里盧廷玉葛延齡邱蚤許元琰奏差鄂都瑪勒百戶黃寅孫安慶推官黃圖嚕岱經歷楊恆知事余中懷寧尹陳巨濟凡十八人城陷之日至正十八年正月丙午也闕號令嚴信與下同甘苦然稍有違令卽斬以狗闕嘗病不視事將士皆籲天求以身代闕聞強衣冠而出當出戰矢石亂下如雨士以盾蔽闕闕却

之曰汝輩亦有命何蔽我爲故人爭用命稍暇卽注
周易帥諸生謁郡學會講立軍士門外以聽使知尊
君親上之義有古良將風烈或欲挽闕入翰林闕以
國步危蹙辭不往其忠國之心蓋素定也卒時年五
十六事聞贈闕摠誠守正清忠諒節功臣榮祿大夫
淮南江北等處行中書省平章政事柱國追封豳國
公諡忠宣議者謂自兵興以來死節之臣闕與褚布
哈爲第一云闕畱意經術五經皆有傳注爲文有氣
魄能達其所欲言詩體尙江左高視鮑謝徐庾以下
不論也篆隸亦古雅可傳初闕旣死賊義之求屍塘

合肥縣志卷二十一 傳 十八

中具棺斂葬於西門外及安慶內附大明皇帝嘉闕
之忠詔立廟於忠節坊命有司歲時致祭云 元史

葛聞孫字景元蚤喪父事母篤孝初出爲州交學歎
曰此非養志之道吾有薄田勤力耕稼亦足以供養
遂歸每旦夕必衣冠見母侍食後始出於舍傍結環
翠山房日與諸生誦說其中間入城見者皆稱爲葛
先生執政薦其學行於朝召爲翰林辭不赴卒年六
十一余闕表其墓所著文集若干卷 江南通志

明

吳復字伯起合肥人少負勇略元末集眾保鄉里歸

太祖於濠從克泗滁和采石太平累官萬戶從破蠻子海牙水寨定集慶從徐達攻鎮江斬元平章定定下丹陽金壇克常州進統軍元帥徇江陰無錫還守常州張士誠兵奄至力戰敗之追奔至長興又敗之於高橋太湖及忠節門士誠奪氣從援安豐平武昌從徐達克廬州下漢沔荆諸郡縣授鎮武衛指揮同知守沔陽從常遇春下襄陽別將破安陸擒元同僉任亮遂守之克汝州魯山洪武元年授懷遠將軍安陸衛指揮使悉平鄖均房竹諸山寨之不附者三年從大將軍征陝西敗擴廓擒其將又敗擴廓於秦州

征土番克河州援漢中拔南鄭明年從傅友德平蜀又明年從鄧愈平九溪長州諸蠻克四十八洞還守安陸七年進大都督府僉事巡北平還授世襲指揮使十一年從沐英再征西番擒三副使得納鄰哈七站之地明年師還論功封安陸侯食祿二千石十四年從傅友德征雲南克普定城水西充總兵官勦捕諸蠻由關索領開箐道取廣西十六年克墨定苗至吉刺堡築安莊新城平七百房諸寨斬獲萬計轉餉盤江是年十月金瘡發卒於普定追封黔國公諡威毅加祿五百石予世券復臨陣奮發衝犯矢石體無

完膚平居恂恂口不言征伐事在普定買妾楊氏年十七復死視殮畢沐浴更衣自經死封貞烈淑人子傑嗣侯屢出山陝河南北平練兵從征二十八年有罪從征龍州建功自贖建文中率師援真定戰白溝河失律謫南寧衛指揮使永樂元年子璟乞嗣正統間再三乞皆不許弘治六年璟孫鐸援詔乞嗣亦不許十八年錄復子孫千戶世襲

明史

楊璟合肥人本儒家子以管軍萬戶從太祖下集慶進總管下常州進親軍副都指揮從下婺州遷樞密院判官再從伐漢以功擢湖廣行省參政移鎮江陵

合肥縣志卷二十一

傳

二十一

進攻湖南蠻寇駐師三江口復以招討功遷行省平章政事率左丞周德興參政張彬將武昌諸衛軍取廣西洪武元年春進攻永州守將鄧祖勝迎戰敗斂兵固守璟進圍之元兵來援駐東鄉倚湘水列七營軍勢甚盛璟擊敗之俘獲千餘人全州守將平章阿思蘭及周文貴再以兵來援輒遣德興擊敗之遣千戶王廷取寶慶德興彬取全州畧定道州藍山桂陽武岡諸州縣而永州久不下令裨將分營諸門築壘困之造浮橋西江上急攻之祖勝力盡仰藥死百戶夏昇約降璟兵踰城入參政張子賢巷戰軍潰被執

遂克永州而征南將軍廖永忠參政朱亮祖亦自廣東取梧州定潯貴鬱林亮祖以兵來會進攻靖江不下璟謂諸將曰彼所恃西濠水耳決其堤岸破之必矣乃遣指揮邱廣攻插口關殺守堤兵盡決濠水築土堤五道傳於城城中猶固守急攻二月克之執平章也兒吉尼先是張彬攻南關爲守城者所詬怒欲屠其民璟甫入立下令禁止之民乃安復移師徇郴州降兩江土官黃英岑伯顏等而永忠亦定南寧象州廣西悉平還與偏將軍湯和從徐達取山西至澤州及元平章韓札兒戰於韓店敗績還捕唐州亂卒

畱鎮南陽未幾詔璟往使於夏時夏王昇幼母彭及諸大臣用事璟旣至數諭昇以禍福俾從入覲昇集其下共議而諸大臣方專恣不利昇歸朝皆持不可昇亦莫能決璟還再以書諭昇終不聽踰二年而夏亡璟遷湖廣行省平章慈利土官覃垕構諸洞蠻爲亂命帥師往討連敗之垕詐降璟使部卒往報爲所執太祖遣使讓璟璟督戰士力攻賊乃遁三年大封功臣封璟營陽侯祿千五百石予世券四年從湯和伐夏戰於瞿塘不利明年充副將軍從鄧愈討定辰沅蠻寇再從大將軍徐達鎮北平練兵遼東十五年

八月卒追封芮國公諡武信子通嗣二十年帥降軍
戍雲南多道亡降普定指揮使二十三年詔書坐璟
胡惟庸黨謂以瞿塘之敗被責有異謀云

明史

趙庸廬州人兄仲中聚眾結水寨屯巢湖歸太祖仲
中累戰功爲行樞密院僉事守安慶陳友諒復破安
慶仲中棄城走還龍江法當誅常遇春請原之太祖
不許曰法不行無以懲後竟誅仲中而以其官授庸
從復安慶徇江西諸路進參知政事從戰康郎山與
俞通海廖永忠等以六舟深入敗敵平武昌還克廬
州援安豐皆有功大軍取淮東庸與華高率舟師克

海安泰州進圍平江吳平擢中書左丞從大將軍取
山東洪武元年命兼太子副詹事河南平庸畱守復
分兵渡河徇下河北州縣進克河間守之尋移守保
定并收未附山寨又從大軍克太原下關陝從常遇
春北追元帝師還遇春卒命庸爲副將軍同李文忠
攻慶陽行至太原元兵攻大同急文忠與庸謀以便
宜援大同再敗元兵於馬邑擒其將脫列伯論功賞
賚亞於大將軍三年復從文忠北伐出野狐嶺克應
昌師還論功最以庸在應昌私納奴婢不得封公封
南雄侯食祿一千五百石予世券已復從伐蜀中途

還十四年閩粵盜起命庸討之踰年悉平諸盜及陽山歸善叛蠻戮其魁散遣餘眾民得復業奏籍蠻戶萬人爲水軍又平廣東盜號鏟平王者獲賊黨萬七千八百餘人斬首八千八百級降其民萬三千餘戶還賜綵幣上尊良馬其冬出理山西軍務巡撫北邊二十年以左參將從傅友德討納哈出二十三年生

胡黨死爵除

明史

葉昇合肥人左君弼據廬昇自拔來歸以右翼元帥從征江州以指揮僉事從取吳以府軍衛指揮使從定明州洪武三年論功僉大都督府事明年從征西

合肥縣志卷二十一

傳

二十三

將軍湯和以舟師取蜀越二年出爲都指揮使鎮守西安討平慶陽叛寇十二年復僉大都督府事西番叛與都督王弼征之降乞失迦平其部落復討平延安伯顏帖木兒擒洮州番酋論功封靖寧侯歲祿二千石世指揮使鎮遼東修海蓋復三城在鎮六年邊備修舉外寇不敢犯發高麗賂遺帝屢賜敕與唐勝宗同褒二十年命同普定侯陳桓總制諸軍於雲南定邊姚安立營屯田經理畢節衛明年東川龍海諸蠻叛昇以參將從沐英討平之已而湖廣安福所千戶夏德忠誘九溪洞蠻爲寇昇同胡海等討之潛兵

出賊後掩擊擒德忠立永定九溪二衛因畱屯襄陽
贛州山賊夏三復結湖廣峒蠻爲寇昇爲副將軍同
胡海等討平之俘獲萬七千人昇凡三平叛蠻再出
練兵甘肅河南二十五年坐交通胡惟庸事覺誅死
涼國公藍玉昇姻也玉敗復連及昇以故名隸兩黨
云

明史

張德勝字仁輔合肥人才略雄邁與俞通海等以舟
師自巢來歸從渡江克采石太平陳埜先來攻與湯
和等破擒之授太平興國翼總管破蠻子海牙水寨
擒陳兆先進下集慶克鎮江授秦淮翼元帥取常州

合肥縣志卷二十一

傳

二十四

擢樞密院判克寧國收長鎗兵下太湖略馬蹟山攻
宜興取馬馱沙及石牌寨進僉樞密院事趙普勝陷
池州德勝往援弗及還從徐達拔宜興普勝復掠青
陽石埭德勝與戰柵江口破走之已復同通海擊敗
其眾遂復池州引兵自無爲趨浮山砦擊走胡總官
追敗之青山逐北至潛山陳友諒將郭泰逆戰沙河
破斬之遂克潛山友諒犯龍江德勝總舟師迎戰殺
傷相當德勝大呼麾諸將奮擊友諒軍披靡遂大敗
與諸將追及之慈湖縱火焚其舟至采石大戰沒於
陳追封蔡國公諡忠毅肖像功臣廟侑享太廟子宣

幼養子興祖嗣職興祖本姓汪巢人

明史

徐用字大用忼爽不羣元亂聚眾數千人自號長鎗
總管太祖命何左丞領兵駐宣州用率其眾降以前
職從攻徽州取池州調守陵陽壬寅守安慶癸卯陳
友諒僞官蔣指揮犯安慶用敗之于鄱陽湖甲辰除
管軍百戶調守南昌丙午指揮宋德成征寧州從有
功還守南昌洪武二年賜階昭信校尉三年調河南
右衛命世襲前職七年正月升河南左衛副千戶加
武略將軍管軍副千戶十一年復命世襲職事十七
年以年老乞休以次子忠代其職三十一年卒永樂

合肥縣志卷二十一 傳 二十五

十一年追贈蔡國公妻張蔡國夫人忠傳具明史

府

志參神道碑

左君弼合肥人元末據州太祖再攻之走汴守陳州
遣使持書招諭曰曩者兵連禍結非一人之失予勞
師暑月與足下從事足下乃舍其親而奔異國是皆
輕信羣下之言以至於此雖悔何及今足下奉異國
之命禦彼邊疆與予接壤若欲獻計帥師侵境其中
輕重自有可量也且予之國乃足下父母之國合肥
之城乃足下邱隴桑梓之鄉寧不思乎天下兵興豪
傑竝起豈惟乘時以就功名亦欲保全父母妻子於

亂世足下以身爲質而求於人既已失策復使垂白之母糟糠之妻獨居寡處天各一方朝思暮望以日爲歲足下縱不以妻子爲念何忍忘情於老親哉功名富貴可以再圖生身之親不可再得足下能畱意於是幡然而來予當棄前非乃復待以故舊則足下於天理人心舉無不順矣君弼猶豫不能決乃歸其母於陳州始感泣納款以副總兵率師討捕底定兩

江府志

合肥縣志卷二十一 傳 二十六

巖府志

徐明爲管軍百戶從守洪都陳友諒攻新城門明躍馬出射賊賊知名併力攻被執死後追封合肥縣男配享洪都忠臣廟以其子爲指揮

傳

見明史趙德勝

石明甲午從太祖克和州渡江累立戰功授管軍上千戶癸卯六月陳友諒舉兵圍南昌守將朱文正告急上率諸將士往援之遇于康郎山明力戰死於陳後追封武節將軍飛騎尉封梁縣子配享康郎山忠

臣廟

見明史趙德勝傳及功臣表舊志作邱明誤崇禎間府志作后明亦非

王德從太祖渡江拔采石取太平等處皆有功授管軍上千戶陳友諒攻南昌守臣告急太祖解廬州圍赴之戰康郎山德陳亡追贈武德將軍驍騎尉封合肥縣子配享康郎山忠臣廟

見明史趙德勝傳

朱鼎與俞通海等歸附從太祖渡江多立戰功授管軍上千戶鄱陽之戰鼎奮勇迎擊面臂中數矢死追贈武節將軍上驍騎尉封合肥縣子從祀康郎山忠臣廟

見明史趙德勝傳

胡通自和陽來附從取江南兩浙江西武昌諸處將軍廖永忠等征廣東通引兵由韶州入取肇慶等郡

合肥縣志卷二十一 傳 二十七

會永忠於廣州降元守將盧左丞積官指揮使升前軍都督僉事

府志

王珪元末集鄉兵守廬州自稱萬戶鎮南巢率眾來附渡江克太平仍命爲萬戶守之歷指揮使升都督

僉事

府志

甯仲英以軍功授前軍都督僉事封建平伯子福嗣

府志

王玉梁縣人歲壬辰與弟瑛同隸太祖軍玉剛勇有謀繆家山砦兵最勁首削平之再蹂黃墩蕩湖口授千夫長取滁和敗青山兵從擊雞籠山羣盜進萬夫

長從渡江以功升右副元帥攻常州擒張士誠弟士德援廣信擒僞漢平章李明道後取江西玉寶首功瑛字君寶玉卒廷議以瑛統其眾從李平章敗僞吳受上賞次第攻下浙閩捕寇海中歷指揮副使北征至通州病卒上痛惜之賜衣廩土田恤其家

府志

鄭祥積功官指揮僉事洪武十四年從西平侯鎮雲南二十年春浪穹逋寇煽羣蠻爲亂鶴慶劍川竝相響應祥乘其未集掩而殲之諸蠻懾服在鎮十餘年善馭下恩威兼濟軍民懷之

府志

高顯梁縣人丙申自太平來歸王師下江浙楚豫入

合肥縣志卷二十一

傳

二十八

元都平關陝顯皆從歷指揮僉事征蜀克松潘諸州城其地請立軍衛置松州指揮使司設官戍守升都督僉事洪武十三年九月卒追封汝陰侯諡武肅

見

明史功臣表

陳文早喪父事母至孝元季挈家歸太祖立戰功積官都督僉事洪武十七年十月卒追封東海侯諡孝勇武臣以孝諡者文一人而已

明史

劉友仁弟謙元末各起兵保鄉里歸明從胡大海取徽寧友仁授中軍左元帥援池州與趙普勝戰歿祀功臣廟謙襲兄職從征江西洪武元年扈車駕幸北

京調守山陝累升都督永樂間卒上聞輟朝遣祭府志

趙馘廬州人隨通海以書納款從征宣城寧國常州皆有功升行樞密院判官以舟師略太湖馬蹟山降張士誠將王貴鈕津經洞庭山敗呂珍於施口復從攻趙普勝於樅陽拔柵江營復池州後征安慶九江等處皆有功府志

王雄以功官都指揮使江南通志

韋權元季從軍爲淮西列校從征渡江所向有功以指揮升都督僉事府志

合肥縣志卷二十一 傳 二十九

戈預梁縣人自和州來歸積功遷中軍都督子戡官指揮以讓兄弼弼有疾復請歸職於戡府志

李榮梁縣人從克滁和由總旗升指揮僉事李文忠征王保保與蠻子哈刺戰文忠馬中流矢下馬持短兵接戰榮以所乘馬授文忠文忠氣益厲遂一戰敗敵俘獲萬計榮翼衛之力居多明史李文忠傳

蕭春洪武初從征以北伐功授延安衛指揮與世襲其後嗣如薰官寧固蘇保四鎮掛印總兵官如蘭南京後軍都督府同知春歿賜葬本鄉之官廳卽舊居處也天啟時同知張邦政立碑記始末至今存焉子

姓世居其地

府志

郭德從太祖渡江取太平鎮江等處又奉命征西土番暨湖湘兩粵屢立戰功授廣洋衛指揮僉事卒諭賜祭葬子昌襲父職任神策衛太祖舉用從征交趾兩使西洋有功陞都指揮同知昌孫震英宗朝從征麓川後鎮大同充總兵掛征西前將軍印英宗復辟賜蟒玉追贈四代爲榮祿大夫子鉉成化中亦以功升左都督同知

舊志

合肥縣志卷二十一

傳

二十

令還衛洪武十九年太祖命耿炳文選陝西都司衛所卒備邊惟英所練稱勁旅加都督僉事明年命率所部隨大將軍馮勝北征抵金山降納哈出遂班師而以英將奇兵三千人爲殿納哈出餘眾竄匿者尙數十萬聞師旋設伏於途謀俟大軍過竄取之未發英後至猝爲所乘衝突不能出馬蹕遂見執敵旣得英思挾爲質英絕食不言乘間引佩刀剖腹死事聞贈金山侯諡忠襄明年進贈樂浪公封其子璵爲西涼侯祿二千五百石予世券二十三年命璵練兵東昌又令駐臨清訓練士卒二十五年召還令同宋國

公勝等簡閱山西士馬璵能修父職帝甚嘉之復令籍山西民兵所籍州縣最多事集而不擾明年坐藍黨戍五開死

明史

馬雲合肥人在遼東與葉旺同功十二年命征大寧捷聞受賞召還京後數年卒嘉靖初以二人有功於遼命有司立祠春秋祀之

明史葉旺傳

瞿能合肥人父通洪武中累官都督僉事能嗣官以四川都指揮使從藍玉出大渡河擊西番有功又以副總兵從都督聶緯討建昌叛酋月魯帖木兒破之雙狼寨燕師起從李景隆北征攻北平與其子率精

合肥縣志卷二十一

傳

二十一

騎千餘攻張掖門垂克景隆忌之令候大軍同進於是燕人夜汲水沃城方大寒冰凝滑不可登景隆卒致大敗已又從景隆進駐白溝河與燕師戰能父子奮擊所向披靡日暝各收軍明日復戰燕王幾爲所及王急佯招後軍以疑之得脫去薄暮能復引兵眾搏戰大呼滅燕斬馘數百指揮俞通淵滕聚復率眾來會會旋風起王突入馳擊能父子俱死福王時贈能平陽伯諡襄烈

明史

湯昭明初積功授統軍元帥後從潁川侯傅友德征雲南克復諸州歷升雲南都指揮同知敕封土田於

梁鄉鎮山嶺卒諭賜祭葬子孫世襲累有勳勞如湯節湯洵湯銳其最著者

舊志

劉眞以開國功累升左軍都督充大寧總兵官靖難兵起眞偕陳亨引大寧軍出松亭關營沙河欲復遵他亨有二心暗結文皇入關眞夜負敕印浮海而南時建文帝聞北平諸將皆降已籍眞家下獄俄眞由海道出福建還應天詔釋之靖難後官左都督鎮遼東恆懷愧憤竟以憂卒眞長女爲文皇昭順德妃次女伊王妃

府志

程嘉眞以字行洪武中被薦爲中書省都事擢執法

合肥縣志卷二十一

傳

三十二

諫議官六年授江西按察司僉事行部興安暇卽謁文廟過紫陽精舍訪求遺書徘徊久之嘉眞以文學稱俗吏之事所不屑爲

府志云見明文衡

文景宗明初授婺源州同知升徐州知州廉介有守時天下初定招徠賑貸勸督農桑民以得生擢守濟南徐人立祠祀之其子箴以廉幹薦任潛江知縣改

平江

府志

蔚綬字文璽洪武中由貢生授戶部主事進員外郎以才能擢山西布政司參議永樂中召拜禮部侍郎綬秉心淳實履行端方宣德初以禮部尙書致仕卒

諡文肅賜祭葬祀鄉賢曾孫春字景元弘治癸丑進
上任兵科給事中遇事敢言陳時政八事邊務七事
咸見施行奉敕清屯兩浙轉福建參議調陝西晉廣
西參政以鯁介爲忌者中傷乞歸

江南通志

孫鎮字希武洪武中諸生以經明行修卒業太學除
戶部度支主事時上以課程事連坐部官鎮諫不宐
連坐忤旨戍滇南已卯春廷臣郭資等薦復職應制
賦禁柳詩稱旨授衛輝知府毀淫祠斥異教以課士
勸農爲務靖難兵起衛輝當南北之衝鎮堅守不下
永樂登極戍山海關宣德初赦回除上饒丞不就卒

合肥縣志卷二十一

傳

二十三

祀鄉賢別號冲玄子著有冲玄稿鄭曉作遜國諸臣
傳詳其事裔孫荆字子楚好著述有廬陽文獻志

志

府

蕭敏乙丑進士授監察御史以風節著

府志

孔立洪武間知象山縣秉心廉直庶事具舉時夏南
秀山寇境立設策殲其渠魁餘黨悉平在任弭旱災
息虎患善政甚多邑人頌之

府志

楊文以開國功官至左都督洪武三十年往遼東練
兵屯田九月佩征虜將軍印代齊讓討林寬明年率
此平軍從燕王備禦開平靖難師起充遼東總兵官

圍永平及燕將劉江戰於昌黎敗績建文四年帝命率遼東兵赴濟南與鐵鉉合以斷燕後至直沽口而

潰

府志

余瑱

本紀作
俞瑱

北平都指揮使同官謝貴密謀拒靖難

師貴死瑱走居庸關宋忠承制令瑱守關瑱簡練關卒得數千人將襲北平成祖命指揮徐安等往擊之瑱且守且戰援兵不至棄關走懷來兵再敗被執不屈死之

明史宋忠傳

徐凱以戰功官都督僉事鎮守四川靖難兵起充副總兵官練兵臨清移鎮滄州與吳傑平安等相為犄

合肥縣志卷二十一

傳

三十四

角兵敗被執不屈死

府志

甯忠累官都督建文初充右副將軍從大將李景隆進拒北平戰於真定敗奔滹沱河再戰被執不屈死忠之妻徐凱女也與凱同死于難

府志

合肥縣志卷第二十二